

17 AUG 1997

Mahathir-Kinabalu

DR MAHATHIR ISYTIHARKAN KETINGGIAN BARU GUNUNG KINABALU

KOTA KINABALU, 17 Ogos (Bernama) -- Perdana Menteri Datuk Seri Dr Mahathir Mohamad hari ini mengisytiharkan ketinggian rasmi yang baru Puncak Low di Gunung Kinabalu iaitu 4,095.2 meter di atas paras laut.

Catatan itu bagaimanapun 5.8 meter lebih rendah daripada ketinggian dahulu puncak itu, 4,101 meter.

"Saya mengisytiharkan bahawa Puncak Low merupakan puncak tertinggi Gunung Kinabalu pada ketinggian 4,095.2 meter," katanya di majlis makan malam sempena Kejohanan Badminton Piala Perdana di sini.

Dr Mahathir kemudian memasukkan beberapa dokumen ke dalam kapsul masa yang akan dibuka pada 25 Jun 2050. Isteri beliau Datin Seri Dr Siti Hasmah Mohd Ali juga turut memasuki sesuatu ke dalam kapsul masa itu.

Ketinggian Puncak Low itu diperolehi hasil satu ekspedisi Institut Juruukur Malaysia (IJM) ke gunung tertinggi di Asia Tenggara itu pada 23 hingga 25 Jun lepas yang turut disertai oleh Ketua Menteri Sabah, Datuk Yong Teck Lee.

Ketinggian sebelum ini pada 4,101 meter telah ditentukan daripada Ekspedisi Learmont pada tahun 1910.

Ketinggian baru itu diputuskan hasil ekspedisi pada 25 Jun yang menggunakan kaedah pengukuran Amerika, berbeza daripada kaedah British yang digunakan dalam ekspedisi yang sama yang mengisytiharkan ketinggian Puncak Low 4,093.4 meter.

Bagaimanapun ketinggian 4,093.4 meter yang diumumkan oleh Yong di puncak gunung itu pada hari berkenaan adalah betul pada masa tersebut tetapi kini ketinggian itu berada 4,095.2 meter di atas paras laut.

Puncak Low dinamakan sempena nama Gabenor Jeneral British di Perak, Sir Hugh Low, yang menjadi pendaki pertama sampai ke puncak itu dalam satu ekspedisi bersama lapan penduduk tempatan pada tahun 1957. -- BERNAMA
kg oba